

蜀域攷古鋪



蜀城殘古鋪



西域考古錄卷第二

海月堂雜著

海鹽俞浩 湛持

西寧府

管縣三 西寧 碾伯 大通

管廳三 循化 貴德 巴燕戎格廳

禹貢析支雍州之域析支卽賜支今府境西南皆古析支地也自秦漢以來羌胡所居昭帝元始元年分置金城郡今府界卽金城郡地矣後漢獻帝末年分金城爲西平郡屬涼州至晉張軌分西平置晉興郡張天錫以

秃髮烏孤自稱武威王徙都於此傳檀遷於姑臧後又
移治樂都爲乞伏熾磐所併後魏以西平爲鄯善鎮孝
昌初罷鎮爲鄯州後周又置樂都郡隋初郡廢仍曰鄯
州煬帝復改西平郡唐初復爲州儀鳳二年置都督府
後復爲州元宗置隴右節度使統臨洮等十軍城綏和
合州平夷三守捉使臨洮軍河源軍州西百二十里白水軍州西二百五十里安人軍置
於星宿川振威軍州西三百里威戎軍酬三百五十里
莫門軍洮州城內寧塞軍廓州城內積石軍廓州西百
八十里鎮西
軍河州城內

天寶改西平郡乾元仍爲鄯州上元初沒蕃大中收復
五代之亂又爲西蕃所據號青唐城宋元符二年收復
仍曰鄯州崇寧三年改爲西寧州仍建隴右節度使又
改軍號曰賓德金因之元亦曰西寧州明改置西寧衛
屬陝西行都司指揮使司

國初仍爲西寧鎮亦設西寧衛碾伯所雍正初年改衛
爲府置西寧碾伯二縣後又增設大通縣巴燕戎格廳
貴德廳循化廳隸焉

顧氏曰西寧河湟環帶山峽紆迴扼束羌番屹爲重鎮

漢武使霍去病破匈奴因斥逐諸羌不使居湟中宣帝
時趙充國留屯金城諸羌遠遁後漢建武中馬援平先
零諸種時議者以金城破羌之西道遠多寇欲棄之援
因上言破羌以西城多堅牢易可依固田土肥美灌溉
流通如令羌在湟中則爲害不休不可棄也從之其後
馬賢龐參往往樹績於此晉室南遷張氏撫有河西亦
能和輯氏羌保其險阻呂光嚴刑峻罰河湟離畔晉隆
安初禿髮烏孤屯據廉川羌酋梁飢攻後涼西平烏孤
欲收之議者多以飢兵強爲疑趙振曰使羌得西平中

外震動非我利也烏孤曰飢得西平保據河山不可復制矣遂進擊飢破之於是據有嶺南之地楊統言於烏孤曰呂光衰耄諸子乖離若使浩亶廉川乘虛疊出不過二年姑臧可圖也烏孤從之後涼益困其後北涼西秦相爭逐於河湟間西秦之亡地沒於吐谷渾後魏復取之以爲秦隴藩蔽隋煬勤兵遠畧地斥四郡唐文皇平吐谷渾而地旋入於吐蕃開元中建雄鎮於州其時兵威震疊薄於海西天寶之後吐蕃乘安史之亂竊據河湟於是邠州之北鳳翔之西皆爲蕃戎之地馴至薄

皇畿犯京師其禍乃烈於東漢時之西羌及宣宗收復河湟而唐亦終不競矣宋關中戍守不越秦鳳熙寧以後始務遠畧圖河湟以制西夏乃議者謂河湟復而宋祚衰夫豈探本之論乎元起沙漠先事西域卒翦夏基遂置吐蕃宣慰司而領之以帝師西平亦其扼吭之地也明初置衛屯兵設茶馬司於此用以馴制蕃部云

湛持居士曰西寧居黃河下游爲五郡門戶南驅河曲北倚天山東控臨洮西通鮮水和連旣宜於畜牧西海亦利於漁佃王韶言欲取西夏當先復河湟蒙

古火落赤嘗大言我但以偏師牽綴西寧銳卒直搗
臨鞏則五郡皆我囊中物也彼有人焉顧其酋不能
用也然而明之得失可得而言也當明祖有天下之
初以蕃俗獷悍欲衆建之以分其勢於是附近西寧
巴沙巴哇申中申藏等十三蕃族各授官領印中納
金牌茶馬諸番戀貢市之利且欲各保世職不敢爲
非誠得禦戎之上策也洎武宗嗣位朝政日非達靼
亦不剌諸部闌入河曲侵掠四衛久之遂據青海諸
番爲所戕殺邊將圍視而不能援豈惟西寧有齒寒

之懼卽張掖武威迄無寧日而當事者方痛飲於危
牆之下清歌於漏舟之中苟非鄭洛招番田樂主剿
則西寧已爲達靼游牧之場其不爲河套之續幾希
夫青海一區昔之西海郡也河曲卽漢之大小榆谷
唐之九曲地也自吐谷渾以來歷唐宋元明郡地之
不登版曹者千餘年及明之中世一變爲蒙古至明
之季世遂爲和碩特所據蓋明自正德以後河西五
郡始有海寇之患我

朝開國之初經畧中原西陲諸部等之羈縻其小小寇

犯無歲無之康熙初年青海諸部蠶屯祁連山縱牧
大草灘連結準夷役屬諸番右臂旣續河西各郡爲
之困弊提督張勇請築扁都口西水關至嘉峪關邊
墻以限內外及十四年王輔臣之變扇動諸部扁都在
甘州東南二百五十里甘州兵赴青海必嗎力幹入
出扁都敵自青海北行必假道扁都口入據涼州之黃城兒勞藏寇紅崖殺遊擊取道扁都口
入犯甘州皆以達賴刺麻檄諭而罷三十五年

聖祖親征噶爾丹遣使宣諭諸部集盟於龍駒島其明
年青海諸台吉入覲京師詔封固始汗子達什巴圖

爲和碩親王餘授貝勒貝子公爵有差蓋至是青海始爲近藩五十六年各部護送裏塘達賴刺麻入藏從大兵戡定西藏詔留兵二千屯青海以備準夷及雍正元年我師平羅卜藏丹津於是令土爾扈特等五旗各自爲部不得復屬和碩特以分其勢以西寧辦事大臣蒞盟自此青海遂同內地爲不侵不畔之臣然而百餘年來以恬以處燕安起於無虞樊蠹生於悠久蒙古日以削弱番族日以強盛故西海諸部畏番人如虎狼防秋官兵昔之離番以制蒙古者今

乃衛蒙古以扞番盛衰之故雖曰天意亦人事有以致之而

國家之撫馭亦張弛隨之矣

西海在西寧府西三百里十三州志西海東去西平郡二百五十里水經注曰古西僊之地也亦曰零海亦曰青海亦曰卑禾羌海亦曰鮮水亦曰允谷鹽池西海以在黃河之西古曰僊海也狄鞮曰庫克諾爾庫克謂青諾爾則積水之名也鹽池在其西南狄鞮曰達布遜諾爾達布遜謂鹽池也海方數百里漢元鼎四年先零羌與匈奴通攻令居圍枹罕遣將平之始置護羌校尉羌乃去湟中依西海鹽池神爵初酒泉太守辛武賢請擊罕开之在鮮水上者趙充國請治湟陁以西道橋七十所令可之鮮水左右元始四年王莽誘塞外羌獻鮮水海允谷鹽池置西海郡後漢永元中護羌校尉周鮪等擊滅畔羌西海及大小榆

谷無復羌寇從隃麋相曹鳳言復西海郡縣治屯田
植穀後涼楊軌爲羌梁飢所敗西奔零海襲乙弗鮮
卑而據其地隋書青海在吐谷渾中周回千餘里海
中有小山以牝馬置此山生駒號爲龍種其西十五
里吐谷渾伏侯城在焉隋伐吐谷渾得龍種其地縱牝馬
二千匹於川谷以求龍種無效而止貞觀八年段志
寧出西海道破吐谷渾追奔八百里去青海三十里
九年大舉伐吐谷渾旣敗之於庫山乃中分其軍爲
兩道李靖與薛萬均萬徹李大亮由北道出曼頭山
論赤水任城王道宗與侯君集趨南路歷破邏真谷
人斫冰馬噉雪五月踰漢哭山進及烏海大破之李
大亮敗之於蜀渾山執失思力敗之於居茹川李靖
督諸軍追至且末西聞可汗伏允在突倫川卽圖倫
磧將奔于闐契苾何力自選驍騎千人直趨突倫川
磧中乏水將士刺馬血飲之襲破伏允牙帳斬首數
千級獲雜畜二十餘萬伏允脫身走俘其妻子侯君
集等由烏海至星宿川及柏海還與靖軍合遂平其
地十二年吐蕃擊破之吐谷渾王諾曷鉢遁於青海

北龍朔二年吐蕃破吐谷渾屯青海咸亨二年薛仁貴敗績於大非川川在青海南儀鳳三年李敬元敗績於青海之上永隆元年黑齒常之敗吐蕃於良非川追破之青海二年贊婆畜牧於青海黑齒常之復掩破之萬歲通天中郭元振議以青海吐谷渾國家要地使吐蕃歸之以易四鎮十姓不果開元十四年悉諾邏掠甘州自積石軍西歸頓大非川涼州都督王君奐追及之青海西乘冰而渡襲其輜重而還三十五年崔希逸敗吐蕃於青海西天寶初皇甫惟明破吐蕃大嶺軍又敗之青海五載王忠嗣與吐蕃戰於青海積石皆大破之七載哥舒翰築神威軍於青海吐蕃來攻擊敗之又築城於龍駒島時有白龍見因號應龍城明年以謫卒二千戍之冬冰合吐蕃大集成者咸沒自是以後中原多故青海爲吐蕃所有設青海節度使以鎮之大中初吐蕃內亂河湟之地復入於唐其後吐蕃旣滅族種分散無復統一宋建隆中首領尚波于獻伏羌地咸平中以六谷都首領潘羅支爲朔方節度使使防禦李繼遷是歲攻西蕃

入西涼府羅支僞降未幾集六谷諸豪及者龍族合
擊繼遷繼遷中流矢死既而繼遷種落陰圖羅支遂
爲其所殺羅支弟厮鐸督代爲首領遂以爲朔方節
度使於時西羌部屬迎哱斯羅至河州於是宗哥立
遵與邈川溫逋奇佐之立文法因徙居宗哥城舊龍
支縣地唐屬鄯州邈川者唐鄯州之樂州在今西寧
東南二百里又有溪哥城者舊積石軍也宋復得以
爲積石軍者也立遵佐哱斯羅甚有威名屬上表求
爲贊普眞宗曰贊普戎王之號立遵方佐哱斯羅其
可與乎乃授以保順軍節度使後溫逋奇謀亂哱斯
羅殺之而改莅青唐會元吳以兵來襲哱斯羅堅壁
不與戰元吳渡水營植幟以志淺深哱斯羅潛使移
所植及元吳衆潰趨志處溺死過半自是數以計敗
元吳而并厮鐸督之衆十餘萬回紇亦以數萬歸焉
其勢遂強於諸羌治平初卒三子皆被恩命曰瞎瑣
居龕谷曰磨瑣居宗哥城曰董瑣嗣爲保順軍節度
使西蕃邈川首領熙寧中王韶復洮河二州瞎瑣子
木征降賜姓名趙思忠神宗討西夏董瑣集六部族

兵十二萬分三路與大軍會拜河西節度使封武威
郡王以其養子阿里骨爲肅州團練使董瑄將死名
諸族首領至青唐城謂曰吾一子已死惟阿里骨母
掌牟瞎逋事我當以種落付阿里骨諸酋諾之旣死
阿里骨遂居青唐元祐元年以爲河西節度使西蕃
遜川首領二年迫其將鬼章據洮州又進築安鄉踏
白城种誼破其城生禽之阿里骨復歸欵詔瀚雪其
罪及死子瞎征承襲久之國人不服迎董瑄兄子溪
巴溫立之朝廷命王瞻招納瞎征歸朝乃度河攻據
遜川以重兵臨之巴溫死子隴拶亦出降賜姓趙
曰趙懷德吐蕃諸首領復立隴拶之弟溪賒羅撒趙
懷德還遜川溪賒羅撒與其黨謀掩殺之懷德遂奔
河南事聞遣童貫將王厚等至京玉關遂拔湟州會
兵宗哥川與戰敗之其酋開門出降詔更鄯州爲西
寧州至靖康之變金人陷陝西六路熙河守帥乃求
青唐種族以湟鄯地與之元平西域降高昌滅西夏
青唐諸首領納土歸欵元仍置西寧州而青海南北
兩路猶爲吐蕃所據今之十三族皆其種類也明有